

25/03/1998

Eropah perlu ubah tanggapan terhadap Muslim

KUALA LUMPUR, Selasa - Datuk Seri Dr Mahathir Mohamad hari ini meminta Eropah menghapuskan tanggapan buruk terhadap umat Islam bagi mengelakkan konfrontasi berpanjangan yang tidak berguna antara kedua-dua pihak.

Pada masa yang sama, Perdana Menteri menegaskan, umat Islam sendiri juga wajar menghargai keprihatinan dan kebaikan Eropah terhadap mereka. Jika Eropah boleh mengubah tanggapan terhadap Islam dan umatnya, satu hubungan baru berasaskan 'semangat saling mempercayai' antara Islam dan Eropah dapat diwujudkan.

Hubungan itu akan menyelesaikan konflik dan pertembungan tamadun di antara Eropah dan Islam pada masa depan.

Jika Eropah boleh menghapuskan sikap permusuhan lebih tebal terhadap Yahudi, yang dituduh sebagai pengkhianat 'Jesus Christ', tiada sebab mengapa mereka tidak boleh mengurangkan sikap permusuhan terhadap umat Islam, mengubah pandangan dan sikap terhadap dunia Islam.

"Begitu juga dengan umat Islam yang harus melihat ke dalam diri sendiri, sumbangan mereka (pada masa lalu) yang menyebabkan Eropah tidak percaya dan menyenangi mereka.

"Masih tidak terlalu lambat untuk berubah. Jika persepsi masyarakat Eropah terhadap Yahudi telah berubah, tidak mustahil tanggapan mereka terhadap umat Islam akan berubah.

"Tanggapan umat Islam terhadap masyarakat Eropah juga harus berubah," katanya berucap merasmikan Seminar Bersama Malaysia-Kesatuan Eropah (EU) bertemakan 'Eropah dan Dunia Islam' di Institut Kefahaman Islam Malaysia (IKIM) hari ini.

(END)